

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB BUKAN LISAN

DARIPADA : PUAN NOR AZRINA BINTI SURIP [MERBOK]

SOALAN

Minta **MENTERI BELIA DAN SUKAN** menyatakan apakah Kementerian mempunyai perancangan untuk membangunkan tanah-tanah terbiar milik Kementerian Belia dan Sukan yang boleh dibangunkan oleh belia yang berpotensi melalui sektor pertanian dan dibiaya oleh bank tanah khas yang diwujudkan di bawah kendalian pihak Kementerian.

JAWAPAN

Tuan Yang di-Pertua,

1. Kementerian Belia dan Sukan (KBS) mengucapkan terima kasih di atas keprihatinan terhadap perancangan membangunkan tanah-tanah terbiar milik KBS yang boleh dibangunkan oleh golongan belia yang berpotensi melalui sektor pertanian.

2. Kementerian Belia dan Sukan mempunyai perancangan di bawah Program Agropreneur iaitu **MyFuture Agro @KBS** di mana program ini akan melibatkan belia massa termasuk graduan ILKBS dengan menggunakan ruang sedia ada (tapak kosong) atau tanah yang masih belum dibangunkan, contohnya di Institusi Latihan Kemahiran Belia dan Sukan (ILKBS) dan kemudahan fasiliti di bawah Jabatan Belia dan Sukan Negara (JBSN) seperti Kompleks Belia dan Sukan (KOMBES), Kompleks Rakan Muda, Kompleks Sukan Komuniti dan lain-lain.

SOALAN NO : 351

3. Antara cadangan Projek Agropreneur yang akan dan sedang dilaksanakan adalah:

- a) tanaman cendawan tiram kelabu;
- b) tanaman fertigasi cili dan timun;
- c) ternakan ikan kanvas;
- d) akuaponik dengan sistem *basic smart farming*;
- e) ternakan udang galah;
- f) tanaman rock melon / golden melon; dan
- g) tanaman nanas.

4. Selain itu, KBS juga akan melaksana model pertanian pintar yang merangkumi dua (2) sistem utama iaitu:

- (i) *Smart Farming – Horizontal (Green House)*; dan
- (ii) *Smart Farming – Vertical (Indoor)*

5. Buat masa ini, KBS sedang bekerjasama dengan **Kementerian Pertanian dan Industri Makanan** (MAFI) untuk **mewujudkan peluang pekerjaan kepada golongan belia dalam bidang AGROPRENEUR** yang dilengkapi dengan penggunaan teknologi terkini serta peningkatan bidang kemahiran pemprosesan makanan yang berdasarkan bidang pertanian dan veterinar. Bagi tahun ini, KBS telah mensasarkan seramai **100 orang belia** untuk dilibatkan dalam **Program Perintis Keusahawanan Agro** melalui penggunaan fasiliti dan ruang tanah yang sedia ada di IKTBN Chembong (Negeri Sembilan), IKTBN Sepang (Selangor), IKBN Naka (Kedah), IKBN Miri (Sarawak), IKBN Kinarut (Sabah) dan IKBN Kuala Langat (Selangor).

Sekian terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : BERTULIS

**DARIPADA : DATO' MAHFUZ BIN HAJI OMAR
[POKOK SENA]**

SOALAN

DATO' MAHFUZ BIN HAJI OMAR [POKOK SENA] minta **MENTERI KEWANGAN** menyatakan aset alih dan aset tak alih milik Khazanah Nasional Berhad yang telah dilupuskan sejak Mac 2020 sehingga Oktober 2020.

JAWAPAN

Tuan Yang di-Pertua,

1. Antara bulan Mac hingga September 2020 (data sehingga suku ke-3 tahun 2020), Khazanah Nasional Berhad (Khazanah) telah melaksanakan pelupusan atas aset dan pegangan saham miliknya berjumlah kira-kira RM8.03 bilion.
2. Dalam tempoh tersebut, aset yang dilupuskan adalah dalam pelbagai sektor dan industri termasuk perbankan, teknologi, kesihatan, tenaga dan telekomunikasi yang terletak di dalam dan luar negara. Antara aset yang tersenarai yang dilupuskan adalah dalam Ping An Healthcare and Technologies, Tenaga Nasional Berhad, Telekom Malaysia Berhad, Alibaba Group Holding dan Prince Court Medical Centre.
3. Pelupusan ini termasuk urusniaga jualan tertutup (*private sale*), pasaran sekunder terbuka (*open secondary market*) dan penempatan saham (*placements*) serta aktiviti korporat (*corporate action exercises*) seperti pertukaran saham dan pengurangan modal.
4. Segala pelupusan yang dilaksanakan merupakan aktiviti operasi biasa Khazanah. Memandangkan Khazanah tidak menerima sebarang suntikan dana berkala daripada Kerajaan, Khazanah menggunakan hasil daripada pelupusan tersebut bagi tujuan membiayai pelaburan baharu serta membayar balik hutangnya yang telah mencapai tempoh matang. Selaku syarikat dana pelaburan negara (*sovereign wealth fund*) yang memegang kepentingan dalam syarikat yang terlibat dalam pelbagai sektor dan industri, Khazanah akan mempertimbangkan peluang pelupusan aset sebaik sahaja aset tersebut mencapai objektif pelaburan dan pulangan sasarannya.

Sekian, terima kasih.